

---

## NA BIERRIS DE ROMANS.

### C.

**N**A Maria , pretz e fina valors ,  
E'l joi e'l sen e la fina beutatz ,  
E l'aculhir e'l pretz e las onors ,  
E'l gent parlar e l'avinen solatz ,  
E la doz car' e la gaia cuendansa ,  
E'l dous esgart e l'amoros semblan  
Que son en vos , don non avetz engansa ,  
Me fan traire vas vos ses cor truan.

Per que vos prec sius platz que fin' amors ,  
E gausiment e doutz humilitatz ,  
Me posca far ab vos tan de socors  
Que mi donetz , bella donna , sius platz  
So don plus ai d'aver joi esperansa ;  
Car en vos ai mon cor e mon talan ,  
E per vos ai tut so qu'ai d'alegransa ,  
E per vos vauc mantas vetz sospiran.

E car beutatz e valor vos enansa  
Sobre totas , q'una nous es denan ,  
Vos prec sius platz , per so queus es onransa ,  
Que non ametz enjendidor truan.

Bella donna cui pretz e joi enansa  
E gent parlar , à vos mas coblas man ;  
Car é vos es gaess' et alegransa ,  
E tot lo ben q'om en donna deman.

---